

INUIT ATAQATIGIIT

INATSISARTUNI



EM 2013/86
6. november 2013
Sara Olsvig

**Ingerlatseqatigiiffiit Kalaallit Nunaannilu oqartussaasut whistleblowereqarnissamut
aaqqissuussinissamut (kinaassutsimik ersersitsisuunngitsumik ilisimasamik
ingerlatitseeqqiisinnaanermut periarfissiisumik) malittarisassiuunneqarnissaannut
Naalakkersuisut peqquneqarnissaannut Inatsisartut aalajangiiffigisassaattut siunnersuut.**
(Inatsisartunut ilaasortaq Naaja H. Nathanielsen, Inuit Ataqatigiit)

Nunaavugut ingerlatseqatigiiffissuit aatsitassarsiornermilu suliniutit appakaatinngilaattaaffiat.

Atortussiassanik aatsitassanillu allanik atuinerput aningaasarsiornitta sukaasa ilagissagaat inuiattut tunaarerusussimavarput. Taamaammat patajaatsumik, isertuaatsumik ersarissumillu aaqqissuussisoqarnissaa pingaartorujussuuvoq aammalu ileqqorlunneq atorfimmillu atornerluineq pitsaaliorniarlugit aaqqissuussinissaq qulakkiissallugit.

Uagut isumarpot malillugu whistleblowereqalernissamut aaqqissuussineq tamakkuninnga pitsaaliuutaqataasinnaavoq. Taamaammat parteeqatitta Naaja Nathanielsenip siunnersuutaa qinersineq pissutigalugu qinigaaffiup siuliani inaarsarneqanngitsoortoq qularutiginagu Inuit Ataqatigiinnit ilalerparput. Naalakkersuisut ilangullutik siunnersummut tapersiinerat nuannaarutigaarput neriuuppugullu Naalakkersuisut asuliunngitsoq oqalussasut akissuteqaamminni allakkamik suliniutinik massakkut aallartitsisoqareermat. Suliniutit tamakku suunersut assut paaserusupparput.

Qitiusumik allaffeqarfimmi soraarsitsiortornerit atorfinititsiortornerillu ungasinngitsukkut takusarpagut. Naalakkersuisut naalakkersueriaasianni ilaatigut naleqqutinngitsulianik peqartoqarnera paasineqarpoq sulianik tamakkuninnga tusagassiorfiit periarfissaagallartillugu qulaajaasarnerisigut. Aviisitigut allaaserisat ilaannit issuaaneq puigulertugassarinngisara Naalakkersuisoqarfiiit ilaanni atorfilitap oqaasianik issuaaneruvoq, tassa “massakkorpiaq kikkut tamarmik toqqorsimaarranniarsaripput.” Pissutsit taama ittut nalitsinni qitiusumik allaffeqarfimmi tutsuiginartumi atuuttussaanngillat. Nalitsinni qitiusumik allaffeqarfik tassaasussaavoq atorfilitat suliassaminut pikkorissuserminnik upperinniffigisinnaasaat, ajortoqarpat qununatik politikerinut oqaaseqarsinnaaffigisaat. Qitiusumik allaffeqarfimmi pissutsit atuuttut takusarlugillu tusartakkagut Inuit Ataqatigiinni aarleqqutigaagut. Sulisunut tunngasutigut suliaasimasut suliaasullu amerlasuut aarleqqutigaagut,

taamatuttaaq ukiup affaani qaangiuttumi torinngitsuliat paasillattaartuarneqartut
aarleqqutigaagut.

Nunarput aaqqissuussinermik tatiginartumik aalajaatsumillu peqassappat taava qitiusumik
allaffeqarfippit ersarissuullunilu tutsuiginartuusariaqarpoq. Avataanit aningaasaliisartut
suleqatillu allat nunatsinnut soqutiginnitsissagutsigit taava akisussaassuseqarnerput imminullu
isornartorsiorsinnaanerput takutissinnaasariaqarparput qitiusumillu allaffeqarfitsinni suliassamut
pikkorissuseqarnerput annerpaaq pigalutigu.

Isumaqpugut whistleblowereqalernissamik aaqqissuussineq eqqortup tungaanut
alloriarnerusoq.